


0 10 20 30 40 50 60 70 80 90 100 110 120 130 140 150 160 170 180

Inches
Centimetres


1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31 32

Kodak Color Control Patches



683.086
868.1

清江先生文集
卷之六
目錄



弁山畢公年譜



吳江門人史善長仲文撰



雍正八年庚戌一歲

公於是年秋八月十八日未時生太倉州鎮洋縣西
 關賣秧橋之榮慶堂邸第按公四十生朝自述詩云
 吾家老宗系本自新安分一遷玉峰麓再遷婁江漕
 蓋公高祖國志公明崇禎間從休甯卜宅崑山縣東
 南鄉吳淞江之濱今綠葭浜畢氏先塋在焉曾祖泰
 來公諱祖泰始遷太倉大父見峰公諱禮父素菴公
 諱鏞前母趙太夫人母張太夫人諱藻系出中吳浙
 江常山令淞南先生德純女孫貴州印江令笠亭先

生之頊女母顧太恭人與武林閨秀林以甯顧姒齊
名時號西冷十子太夫人幼承母訓親聞經史大義
及古今忠孝廉節事皆默識其原委雍正六年少宰
黃公叔琳奉

命督修海塘寓居吳下與淞南先生同年至契聞見峰公
陰行善事曰其後必昌由是締姻實生公江鄉風俗
常以八月十八日傾城士女至吳淞江干觀潮公適
誕於是日見峰公因錫名曰潮生其六十自壽詩所
云予生恰值潮生日花滿天香月滿輪者是也

九年辛亥二歲

十年壬子三歲

十一年癸丑四歲

弟瀧生

十二年甲寅五歲

祖母汪太夫人卒

十三年乙卯六歲

公天性穎異素菴公少羸弱久謝舉業見公資稟絕
人私語太夫人曰異日亢吾宗者必此子也吾多病
不能自課君嫻文事宜嚴督之太夫人手授毛詩離
騷纔一過輒能覆誦由是母教益勵

乾隆元年丙辰七歲

二年丁巳八歲

弟澧生

三年戊午九歲

曾祖母趙太夫人卒

四年己未十歲

始學為詩自題慈闈授詩圖序云沅甫十齡母氏為講聲韻之學閱一二年稍稍解悟繼以東坡集示之日夕復誦遂銳志學詩同里張丈冰如為繪慈闈授詩圖自題四絕用誌家學所自

五年庚申十一歲

六年辛酉十二歲

太夫人命公出就外傳從嘉定毛先生商巖受業為

制義根柢經術淵雅深醇一洗時下側媚之習里中尊宿如沈光祿起元顧行人陳埈並老於文稱為後來傑起

七年壬戌十三歲

八年癸亥十四歲

九年甲子十五歲

公所著靈巖山人詩集四十四卷存彙始於是年迄辛未為硯山怡雲集四卷時方卒業文選泛覽秦漢唐宋諸大家窮其正變詩取徑眉山上溯韓杜出入玉谿樊川之閒蓋甫入文壇已獨樹一幟矣

十年乙丑十六歲

楊編修繩武雅推重公每索觀近作親爲評騭獎借不容口集中有卽座賦呈詩

十一年丙寅十七歲

齋中芭蕉作花公賦詩有序云紅蕉書館忽放蕉花一朵狀大如斗日舒一瓣現黃金色殷麗溢日芬芳襲人自夏徂冬榮而不萎觀者以爲文字之祥賦詩紀異浙西范處士西坪善弈稱國工常王公家公隅坐旁觀偶與對局范讓公僅可三子訝爲天授見峰公以游藝廢學力禁之後游輦下亦竟無抗手者集中有秋堂對弈歌追紀其事

十二年丁卯十八歲

讀書硯山書堂

十三年戊辰十九歲

春二月汪夫人來歸夏四月素菴公卒公擗踊號慟不能起太夫人慮過哀毀命理舊業仍居硯山書堂於時惠徵君棟博通諸經著書數十種至老彌篤公叩門請謁問奇析疑徵君輒娓娓不倦由是經學日邃

十四年己巳二十歲

十五年庚午二十一歲

長洲沈文愨公德潛以風雅總持東南海內翕然宗之公從之游每稱公詩有獨往獨來之概南朱北王

不能不讓後賢獨步嘗同遊香雪海賦探梅歌暨梅花七律十首亟爲歎賞是歲見峰公卒公髫齡卽爲大父鍾愛其四十生朝自述詩云寶護比珠玉愛養如心肝下筆爲文章一見便喜歡也

十六年辛未二十二歲

緣葭浜濱臨吳淞江每春秋展墓歲必數至至則盤桓佇戀賦吳淞權歌五十首太夫人語公以讀書期於有用朱子謂鄉村坐壞人曷往遊 京師且省舅氏當益擴聞見由是治任北上

十七年壬申二十三歲

春二月就道夏抵 京師館族祖給諫 槐蔭書堂

著有三山攬勝白門訪古渡江燕臺諸集嘗賦病馬

行直隸總督方恪敏公 觀承 少司空裘文達公 日修

一見有國士之目秋九月訪舅氏寶田先生於保陽

時婁東張助教鳳岡先生 敘 以經術名於海內主講

蓮池書院與寶田先生爲族弟因是留公肄業切

劘最深吳下經生首推張惠公兼聞緒論引伸觸類

於漢唐諸儒之說疏證精覈其學大成有蓮池吟草

上下卷

十八年癸酉二十四歲

秋八月應順天鄉試中式舉人正考官協辦大學士

合河孫文定公 嘉淦 副考官禮部侍郎滿洲嵩公 壽

本房監察御史桐城張公若淮知貢舉副都御史江
都申公甫

十九年甲戌二十五歲

春闈報罷謁外王父笠亭先生於天雄書院旋歸里
門有五湖載酒集上下卷

二十年乙亥二十六歲

春夏家居爲近遊東西洞庭屐齒都遍秋七月長子
念曾生九月復束裝北上歲暮抵京師補授內閣
中書入直軍機處故庚辰春朝詩中有西垣初直纔
臨亥之句

二十一年丙子二十七歲

公儼直

樞庭目攝手披才思敏給大學士傅文忠公恆汪文端

公由敦久筦機地識鑒宏遠早以公輔期之有青瑣

吟香集前後凡三卷

二十二年丁丑二十八歲

二十三年戊寅二十九歲

二十四年巳卯三十歲

公少年風姿英爽值西北用兵公屢欲從軍不果其
後悼亡詩有云書生無命問腰犀可以見其志巳秋
八月弟澐應江南鄉試中式舉人冬十月平定回部
大兵凱旋奉

旨從優議敘軍功加一級有

聖武遠揚平定回部西陲永靖大功告成恭紀詩

二十五年庚辰三十一歲

春三月以內閣中書應禮部會試中式第二名進士

總裁大學士常熟蔣文恪公溥刑部尚書金匱秦文

恭公蕙田禮部侍郎滿洲介公福副都御史金匱張

文恪公泰開本房編修平湖錢公大經夏五月對策

太和殿

上覽經學屯田二篇嘉獎再三拔置一甲一名授翰林院

修撰充

日講官起居注有臚傳紀

恩詩云敢冀茂才居異等免嘲名士總虛聲又詩書少荷

慈闈訓姓字親叨

御筆題皆紀實也著閩風集前後三卷按吳中舊有潮到

維亭出狀元之諺已卯秋潮適過之至是果驗

二十六年辛巳三十二歲

散館入直翰林院時弟雲以庚辰應試留京一時聲

名籍甚旋南歸公他日賦詩有愁吟軾轍聯牀句怕

說機雲入洛年之句

二十七年壬午三十三歲

二十八年癸未三十四歲

掌院劉文正公統勳以公才望夙著凡院中文章制

誥悉委公手定

二十九年甲申三十五歲

春二月長女智珠生公先寓石虎街裘文達公第冬

十月移居宣武門外聽雨樓樓後二小軒湯少宰

右會書額曰得石有聽雨樓存橐四卷

三十年乙酉三十六歲

春二月陞授詹事府右春坊右中允

三十一年丙戌三十七歲

春三月充會試同考官陞授翰林院侍講

欽命教習庶吉士兼一統志方略館纂修官是歲弟灃以

舉人分發江西試用知縣

三十二年丁亥三十八歲

春三月以講官侍

耕藉時久旱

上盼雨綦切聞林闕布穀聲有

御製耕藉禮成詩一章

召公給筆札卽時和

進稱

旨夏五月遷右春坊右庶子掌坊事仍兼侍講

上以公才可大用非詞臣能盡其所蘊冬十月

特旨補授甘肅鞏秦階道十二月出京請假歸省按四十

生朝自述詩云丁亥補外初烏私念明發一麾六千

身山畢公年譜
里暫假五十日上堂拜我母母心大歡悅有萍心漫
草一卷

三十三年戊子三十九歲

夏四月抵甘肅總督吳公

達善

知公才略奏留綜理

新疆經費局務遂駐蘭州秋九月兼署按察使事有

隴頭吟一卷

三十四年己丑四十歲

有崆峒山房集二卷夏四月汪夫人卒於蘭州官舍

夫人名德字清芬吳郡人父禱嗣黃山夢神以綠衣

女子昇之是生夫人年二十來歸得太夫人歡與公

伉儷綦篤有悼亡詩數十首安仁望廬子荆除服無

以踰其哀思也

三十五年庚寅四十一歲

甘肅連歲旱荒各屬官倉已空方議撥運公於春二

月東行安會道中感時述事寄蘭省當事諸公詩有

云已絕全生望猶爲半死人又解渴爭泥水充飢盡

草根四年三遇旱十室九關門又怪烏呼魂魄妖狐

噉血鬻又賣兒償一飯鬻婦索千錢吞聲知淚盡分

手尙衣牽又可憐人餓死賑冊尙留名率沈痛不忍

卒讀夏六月得大雨賦喜雨詩二十韻奉

旨調補安肅道秋八月奉

命隨總督明公

山

出關經理屯田自木壘河至吉木薩往

返數萬里有秋月吟笈集杏花亭吟草各一卷奇峭
雄傑詩格至是一變階州惡少糾結黨朋武斷鄉曲
有書吏舞法羣起折毀其宅長吏畏縮莫敢問公與
明公適來分捕窮鞫得實列罪爲三等無漏網者作
哀愚民一篇以儆官吏

三十六年辛卯四十二歲

春正月奉

旨補授陝西按察使時

大駕巡幸山東趨赴

行在請

訓詢及甘肅連年苦旱具奏宿麥未登新苗待槁狀甚悉

有

旨飭督臣加意賑撫並將通省積欠籽種口糧銀四百萬
兩全行豁免夏四月抵任廉得奸宄爲閭里蠹者三
十餘人悉寘於法境內肅然弟灃沒於江西甯州公
寓公先有夢三弟詩至是聞訃有哭延青三弟詩因
罄廉俸爲姪裕曾置產五月署理布政使事冬十月
奉

旨補授布政使十二月護理巡撫印務會兩金川蠢動京
兵及各省綠營兵揀派入蜀凡所徵調皆公任之又
思金川谷遠碣堅利用槍礮攻擊火藥鉛彈川省所
貯未必能足復撥解西鳳興漢等營及西安清軍廳

藥彈共二十五萬斤火繩三千斤送廣元縣存貯備用旋有

旨飭辦而公已先十日運送矣其平生精神周密多如此著有青門集一卷

三十七年壬辰四十三歲

春正月奉

旨督理陝西軍臺事務是月回布政司任公雖調遣軍務偶有餘暇不廢吟詠上元前一日喜雨詩云五更斗入清涼夢萬物平添歡喜心又花朝復雨詩云洗兵佇看邊氛靜上帝喧傳米價平痾瘵民情隱然可見又二月二十日夜夢中得二十八字醒後能記詩云

俯仰平生任俠名崢嶸身世劍縱橫淵深岳峻空今古二十年前心已平公自云詩甚奇然不解所謂也是年恭逢

皇太后八旬萬壽請以本身妻室封典賜封曾祖泰來公資政大夫曾祖母趙氏夫人於是三世均霑寵誥時論榮之夏六月奉

命護理巡撫印務按西安使署靜寄園諸詩題梅花道人殘竹畫卷皆署篆時作時大軍進勦小金川其地風高氣肅節候早寒公請征兵衣履先於藩庫借領銀兩分派營員製造又慮各營率沿邊散布地僻物稀西安同州二屬貨既充物工匠易集卽飭設局製備

於八月望前全數運送軍營而辦理西路糧饟鄂侍郎寶復有長夫輓運不若騾馱爲便之奏公謂南路軍營山峻道紆需糧更急請將陝西所買騾四千頭解至成都就近調撥二千赴南路應用而以二千解送西路則西南兩路軍儲均可早獲騾運之益

上覽奏並深嘉之秋九月回布政司任公以蘇東坡先生曾任鳳翔通判故於十二月十九日生辰設祀招賓客賦詩始於是年公先成七古一篇和者十有四人自此歲以爲常凡知名之士來幕中者皆續詠焉

三十八年癸巳四十四歲

春正月奉

旨護理巡撫二月奏請添改棧內驛遞以節馬力時撥運部庫銀五百萬兩又續解軍營火藥公令以火藥先運寶雞俟運鞘騾頭倒回馱送廣元接替轉運省費數萬閏三月請設長安斗門鎮朝邑大慶關主簿部議從之夏五月河洛渭水並溢朝邑之東西境凡二十七村莊衝塌民房八千九百六十六間被災民口二萬六千三百六十七人公馳往查勘分別賑卹全活甚眾自四月至十月籌備南棧運送京兵並添派陝甘兩省綠營兵三千又派吉林兵四千西安駐防兵二千又添派索倫兵二千章程預定毫無紛擾又接運軍饟銀一千五百萬兩撥解火藥二十五萬斤

鳥槍三千桿腰刀四千把一一籌應安速復親由寶
雞以至甯羌往來巡護途次凡四閱月耕牧無驚其
各臺安設車馬夫騾自潼關至咸陽皆已改撥移駐
防兵之用自興平至甯羌州各站俱於大兵過竣後
概令撤回歸農每奏入輒奉

硃批曰用心可嘉如所議速行矣曰諸凡皆妥曰如此留
心籌畫料理真能不負任使冬十一月補授陝西巡
撫著有終南仙館集前後共三卷是年長子念曾娶
婦陸氏 誥封朝議大夫陸公寅女廣西泗城府知
府受豐妹

三十九年甲午午四十五歲

春二月奉

賜評鑑闡要全部關輔自去冬至春不雨省西關舊有太
白山神廟公致齋步禱遣官於靈湫取水甘霖立沛
按太白山卽禹貢惇物在郿縣境高二百九十里峰
頂積雪四時不消有靈湫數處歷代以來久著靈異
公東坡生日詩云太白西南作靈雨公前請封後及
予自注云郿縣太白山神東坡先生曾請封公爵後
降乾隆五年川陝總督尹公繼善奏請列入祀典至
是具摺奏請封號有

旨加封昭靈普潤太白山神並

御書喜雨詩章

賜公公有恭和詩並跋一首 京察屆期吏部開列在外
督撫名單進

呈奉

旨畢沅著交部議敘夏五月迎太夫人至署公弟瀧隨侍
公莅任秦中屢次迎養太夫人以年老不欲遠涉惟
作詩箴之云讀書裕經綸學古法政治功業與文章
斯道非有二汝宦久秦中游膺封圻寄仰沐

聖主慈

寵命九重賁日夕爲汝祈冰淵愼惕勵警諸構榼材斲小
則恐敝又如任載車失誠則懼躓捫心五夜慚報答
奚所自我聞經緯才持重戒輕易勿以求煩苛勿以

察猥細勿膠柱糾纏勿模稜附麗端已勵清操儉德
風下位大法而小廉積誠以去僞西土民氣淳質樸
鮮糜費豐鎬有遺音人文鬱炳蔚況逢

郵治隆鈞陶綜萬類閭閻守耕鑿饁畝士依媚大田歲
屢豐多遺秉滯穗鼓腹徧康衢擊缶樂酒饔民力久
普存愛養在大吏潤澤因時宜擗節善調劑古人樹
聲名根柢性情地一一踐履真實心貫實事曩蹟永
不磨昔賢庶可跂千秋照汗青今古合符契不負生
平學不存溫飽志卓哉韓范賢治績前史備事事規
模之其乃克有濟上酬

高厚恩下爲家門庇我家祖德詒箕裘罔攸墜痛汝早失

怙遺教幸勿棄衰年逼桑榆垂老筋力瘁曳杖看飛
雲日斷秦山翠睡起日高春乾鵲噪新霽披衣覽鏡
匳霜雪滿鬢髻惟餘望汝心任大勤自誌書此遠寄
汝汝宜日誦記勉旃矢弗渝用作官箴肆至是就養
官署一路察訪政聲聞長安父老俱稱中丞之賢太
夫人喜抵署又賦詩云驂駢乍解路三千風物秦川
慰眼前到處聽來人語好頻年豐樂使君賢連朝話
舊到更深不盡婁江望遠心莫怪老人添白髮兒童
幾輩換鄉音周遭竹嶼與花潭檻外雲光映翠嵐儘
有瑣窗詩料在不須回首憶江南秋八月監臨文闈
冬十月典試武闈時川省軍營連次克捷公籌運礮

子箭枝協撥銀鑲章程如前又請開采甯羌州銅礦
改留壩廳通判爲同知改三原縣爲要缺奏入並報
可

四十年乙未四十六歲

公器量閎深惟以維持風教激揚士類爲己任天下
翕然歸之關中舊有書院爲馮恭定先生講學地公
蒞任後諮訪明師必取博通今古品行方正者主之
妙選俊髦潛心數學共相觀摩後與司道按月輪課
親赴書院詳加甲乙並飭各府州縣書院皆實心延
訪通人其姓名籍貫及更換開館日期具報撫藩衙
門察核兼責成本道訪查有不稱職者更之以收實

效勵人材奏入

諭各省建立書院處皆倣之春三月兼署西安將軍印按

是月十六日行經鳳翔同嚴侍讀長明宿東湖坡公

祠坐月宛在亭流連竟夕賦七言絕句五首侍讀與

嵇學政承謙繼和田太守錫莘勒石湖上公命修葺

祠宇開通湖水復還舊觀涇陽龍洞渠卽鄭白渠故

道歷唐宋元明代加修理灌溉農田爲利甚溥渠傍

仲山之麓鑿石而成流泉百道噴薄如斗俱委輸渠

內勢若建瓴惟渠與涇河僅隔一隄涇水泥多每值

暴漲倒灌渠中易致淤積歲修動項不敷司事者因

循遷就日復一日泥滓充積渠底增高水源旁溢下

流地畝逐漸減少不及時經理必致淤塞斷流使數
千年美利遂至湮沒公親詣仲山洪口周覽形勢與
司道籌議修濬至次年工竣奏

聞夏四月卸將軍事五月修理棧道工竣六月清釐八旗
馬廠空地與平盤屋扶風武功四縣境內每旗分
地一百二十頃共九百六十頃牧放馬匹公署任西
安將軍時以官兵移駐新疆現存馬三千五百匹只
需四旗廠地足充牧放其餘四百八十頃飭交地方
官招募附近居民開墾納租爲八旗賞卹之用奏入
准行秋九月禱澤華山之金天宮大雨三晝夜老幼
踴躍歡呼公具奏

御書岳蓮靈澍四字縣諸嶽廟並

御製喜雨詩以

賜公敬和兼為跋尾以誌光榮又著華山祈澤記一卷勒石廟中是歲前後運送川營部庫銀一千萬兩又添派陝兵二千名撥解火藥十萬斤箭十萬枝逮大兵攻克勒烏圍紅旂奏捷奉

上諭大功指日告成一切善後事宜尙須經費公從容規畫輒先期預備以待凱旋有聞官兵攻克美諾連破礮卡殺賊大勝誌喜詩

四十一年丙申四十七歲

春二月大小金川全境蕩平有平定兩金川大功告

成恭紀饒歌十八章旋奉

欽頒

御製文一軸三月署理陝甘總督印務夏四月抵蘭州任直省學政是科例選拔貢生公以新疆之鎮西府迪化州宜禾昌吉二縣俱經建學設有附學生應與內地各屬一體考試如有足稱選拔之才者酌量拔取一二名以昭鼓勵奏可六月回巡撫任即束裝馳詣灤河

召見

避暑山莊蒙

恩賞戴花翎隨奏

呈所輯關中勝蹟圖誌三十卷

上覽而嘉之命儒臣撰錄提要鈔入四庫全書秋八月回
西安九月孫蘭慶生冬十一月兼署西安將軍印是
月十九日合葬大父見峰公大母汪太夫人父素菴
公前母趙太夫人於鎮洋縣十九都之新阡並營張
太夫人生壙蓋公先於六月閒遣弟灋歸籍卜地至
是始克蠲吉也十二月舅氏寶田觀察來西安是年
姪繼會由鎮洋縣籍充選拔貢生公弟灋子

四十二年丁酉四十八歲

春正月卸將軍事夏五月奏請修岳廟及諸古蹟其
略云太華山爲西陲靈岳廟在華陰縣東五里禋祀

岳帝自唐虞三代以來卽爲望秩居歆之所規模輪
奐靈蹟巋然年久失修殿宇牆垣多有朽滲傾圯之
處去秋瞻

覲陳奏荷蒙

俞允茲於本年二月興工再關中係臨邊重鎮西接新疆
爲外藩朝覲往還必經之所沿途古蹟如灞橋溫泉
崇仁慈恩兩寺俱漢唐名勝近年以來所有陵墓祠
宇雖經臣次第補修但勝蹟旣多工費亦鉅旣未便
頻請動項亦不宜任其荒頽因與司道等悉心集議
總期節糜費而壯觀瞻事不勞而工易集也有

旨著將陝省應解戶部正項內扣存十二萬兩是時金川

既已平定往來差務絡繹公以地方情形今昔不同
設官分職貴乎因地制宜庶名實相副至衝途繁劇
尤宜添設佐理乃奏請更定西安府屬之興平鳳翔
府屬之扶風岐山鳳翔四縣改爲衝繁中缺西安府
屬之鄠縣盩厔同州府屬之大荔朝邑四縣改爲繁
難中缺又同州府屬之華州吏目外添設州判一員
西安府屬之涇陽縣丞請移駐治峪鎮又請將提標
五營馬廠在西安府屬之長安咸陽興平鄠縣高陵
等縣境內者及後營廠地在邠州屬之三水淳化二
縣境內者除沙磧嫌灘土脈磽瘠不堪耕種外約可
墾地一百七十頃六十九畝招民墾種以歸實用公

雖當燕閒而國計民生無一不熟籌胸次尤好表章
前哲大學士黃公廷桂尹公繼善陳公宏謀總督吳
公達善在秦時皆有善政奏請入祀名宦祠 京察
屆期吏部開列在外督撫名單進

呈奉

旨畢沅著交部議敘秋八月監臨文闈有試院中秋翫月
詩冬十月典試武闈時新疆人士不遠萬餘里雲集
觀光公請嗣後凡嘉峪關以外鎮西迪化等屬不論
鄉會試均照雲貴之例每名給驛馬一匹奏可

四十三年戊戌四十九歲

公在秦頻祈雨澤皆獲有秋春二月親詣郿縣太白

山神祠報祭並奉

御頒金精靈澤四字殿額夏五月復遣官取水靈湫甘霖
三日

御賜得雨志慰詩嘗因事經咸陽縣北畢原展謁

元聖周公墓諮訪後裔有姬姓奉祀生一人守墓公以
關閩濂洛諸儒後裔皆有世襲之職至伯禽少子之
食采於東野者爲東野氏已於康熙年間

聖祖仁皇帝加恩世襲翰林院五經博士今咸陽爲

元聖祠墓所在宗支單弱雖有奉祀生之名實與齊民
無異請

加恩添設五經博士一員准將咸陽姬姓嫡派子孫照曲

阜東野氏之例子以世襲俾永奉

元聖周公及

文武成康四王陵祀奏入部議允行秋八月寶田觀察
入都公侍太夫人餞送灞橋河上有五古一首次孫
芝祥生

四十四年己亥五十歲

春三月巡閱興漢鎮標兵夏四月署理陝甘總督印
務赴蘭州任五月至西甯日月山督辦西藏班禪額
爾德尼入

覲事秋七月回巡撫任八月恭屆

萬壽恩科鄉試監臨文闈冬十月典試武闈奉

賜

御題西域戰功全圖十六幀

御製久任詩一幅西安古稱天府四塞自豐鎬宅京而後秦漢隋唐咸建都於此因是掌故甲於他省公來撫茲土七年名山大川以暨故墟廢井車馬經由過半於山則終南惇物太乙華山武功太白於水則灞滻涇渭澧漓潦滹其閒存亡分合雖孔傳班書桑經鄜注迄無定論錐指莫由其他襲故沿譌更難究詰古之纂述如關中記三輔決錄咸鎬古事兩京新記兩京道里記皆散佚不傳幸宋敏求長安志藏書家尙有副本因屬通人蒐薈羣籍凡與秦中文獻關涉者

計得千五百種發凡舉例類聚區分文成數萬爲門一十有五分類五十有一合成一百卷親加裁削爲西安府志八十卷時以太夫人寢疾久未卽安憂形於色故五十自壽詩有掄年只數

君恩重問寢惟祈母病瘳之句十二月八日太夫人卒於西安官舍先是奏懇解任未得請丁憂後續奏

諭旨著回籍明年巡幸江浙在蘇接駕按公自太夫人來署後孺慕如孩提每因公出歸凡途中所歷必縷陳山水奇勝處以博歡笑故太夫人有聞大兒話華嶽諸奇勝五律三首其警句云踏空來日月穿海出星辰峰頭難度鳥樹腹可藏人又千山藏一寺削壁貼

孤亭雨過河流濁煙收樹色青又崖空俱可館石小亦成巒皆唐音也有培遠堂詩集四卷行世青浦王少司寇祖為之序太夫人二女長汾次湄公女智珠並能詩閨門風雅一時方之劉妹謝女由太夫人之教也

四十五年庚子五十一歲

春正月奉太夫人靈輓歸里三月

大駕南巡公出潁墅關迎

蹕屢蒙

召對

行殿

慰問甚至公具陳少日孤貧賴母教養成立狀

上嘉歎

御書經訓克家四大字以

賜公既奉

賜乃擇靈巖山之陽建

御書樓旁築祠宇奉太夫人像六時瞻禮俾子孫毋忘

國恩家嫩秋七月祠成嘉定錢少詹事大昕為之記錢唐

梁侍讀同書書石其略云弇山畢公早年失怙奉慈

命讀書山中感晝荻之勤勵斷齋之操用能處寬閒

寂寞之區具先憂後樂之志及學成而大魁天下出

入

禁闈保障方面當代推之一以爲燕許一以爲韓范而公抑然自下指讀書故廬淚涔涔落謂吾母之訓言猶在耳也度所以妥先靈者惟此地爲良爰築祠堂於斯山中人皆走相告曰如中丞公洵所謂五十而慕者乎

御書樓記亦少詹撰並勒石祠內又有問梅禪院以太夫人生時虔禮大士故事之如生云冬十月江蘇巡撫傳奉

御旨陝西巡撫員缺緊要畢沅前任西安最久熟悉該處情形且守制將屆一年一時不得其人著前往署理不必來京請訓公聞

命卽行十一月抵西安任中懷銜卹時復情見乎辭其題沈雲浦永慕圖云病心心模黏飲血血漉漉蘸血寫慈顏斑斑染素幅又云展圖見君心掩圖令我哭此卽蓼莪篇沈痛起振觸又云麻衣正廬居題詩忍卒讀也

四十六年辛丑五十二歲

春三月華陰岳廟工竣遵

旨繪圖進

呈有奉

敕重修華嶽廟落成恭紀七言排律二十韻甘肅河州循化廳撒拉爾番回因爭教仇殺知府楊士璣副將新

柱同往查辦均被害公聞即令提督馬公彪帶領西

安綠營兵一千名迅赴河州而將軍伍公彌泰副都

統薩公炳阿亦帶滿營兵一千六百名星馳協剿尋

聞賊陷河州逼蘭州焚燒關廂官兵傷折大半公飛

調延綏鎮兵一千五百名令從固原平涼一帶前往

與漢鎮兵五百名令從略陽鞏秦一帶前往又調潼

關協將都司等帶兵三百名赴營接濟猶恐各路兵

程途遙遠即晝夜遄行亦需時日而賊勢猖獗已甚

請發八旅勁旅

簡派熟悉軍務大臣帶領前來策應方可立就剿除是時

文報隔絕已六日傳聞異辭公選幹弁赴蘭偵探始

悉賊前此攻圍甚急後官兵陸續齊集加以土兵不

下二萬殺賊甚多賊初屯城內五泉山近移西南之

龍尾山梁去城較遠其地西北兩面俱隔黃河西南

隔洮河西甯兵由遵化一帶繞出其後而河州收復

小路已經堵禦大兵會剿立可殲擒惟狄道在河蘭

之間東通秦鞏山勢險窄公先慮賊竄入密飭延綏

與漢二鎮兵由安定閒道馳往截其後路既入奏有

旨畢沅在陝西境內聞甘省逆賊滋事即能悉心調度事

事妥協並有先辦而與朕旨相合者實屬可嘉著賞

給一品頂帶大小荷包各一對仍交部從優議敘公

奏謝有云番回小醜肆逆稽誅覆載尚且不容鄰封

豈宜忽視明知遠道行師不無繁費然繁費之事小而遲誤之事大用是不揆樛昧因事酌籌實職分所當爲詎

褒嘉之敢望奉

硃批具此識見然後可任封疆秋七月逆回平定嗣河溢朝邑縣境城中及東南北三鄉五十三村莊溺斃男女八百三十餘人衝塌民房二萬二千三百九十六間被災民口三萬四千六百八十餘人公奏請給銀修葺埋葬並分別撫卹加賑各有差新校山海經成一考篇目二考文字三考山名水道自序云役於官事校注此書凡閱五年自經傳子史百家傳注類書

所引無不徵也其有闕略則古者不著非力所及矣既依郭注十八卷不亂其例又以考定目錄附於書其云新校正者仿宋林億之例不敢專言箋注俟後之博物也公嘗以金石文字之在六朝前者多足資經典考證其唐後所載地理職官及人物事蹟亦可補正史傳譌誤關中舊有田概京兆金石志而唐史載乾元中京師壞鐘像私鑄小錢會昌中李都彥以鐘鐸納巡院充鼓鑄用宋史載姜遵知永興軍太后詔營浮圖毀漢唐碑碣以代磚甃是關中金石日亡日少廣爲搜薈數年間得金十三瓦三石七百八十一公餘稽經誼史訂誤補亡撰關中金石記八卷

盧學士

文昭

錢少詹

大昕

序之公哀慕太夫人不衰

八月十五夜更鼓四下寢不成寐泫然感述又敬題
先太夫人手鈔唐詩選後各一首所著有終南仙館
續集二卷玉井拳蓮集一卷皆再撫秦中時作九月
長子念曾卒冬十月盤查同州府屬監糧尋以失察
甘肅冒賑事奉

旨降爲三品頂帶仍辦理陝西巡撫印務不准支給養廉
十二月盤查西鳳邠乾四府四屬監糧是年奉

賜

御製古稀說一幀改教詩墨刻一幅全韻詩擬白居易新
樂府各一部甘省秋收及得雨情形詩墨刻一卷

四十七年壬寅五十三歲

公前後撫陝至是已十年嘗賦上元燈詞十首其首
章云絡角星河不夜天春燈人自卜春田兒童編作
秧歌唱關內豐登已十年亦自喜也春二月奏以興
漢二屬暨終南山一帶地方險要宜改設官屬俾資
控制而重稽防請陞興安州爲府改州吏目爲府照
磨漢陰縣爲附府安康縣其州縣學正訓導以次遞
改漢陰舊治另設撫民通判駐劄州西南二百四十
里磚坪歸安康管轄另設分防縣丞又紫陽縣西南
一百八十里之二州壩平利縣東南四百八十里之
鎮坪與川楚連界二州壩添設主簿卽裁西安府知

事缺改駐於此鎮坪添設巡檢漢中府屬西鄉縣南三百里之大池壩添駐分防縣丞褒城縣南一百三十里之黃官嶺添駐巡檢而裁汰舊設青橋驛丞缺至終南一山縣互西鳳漢興商約周圍數千餘里東自咸甯大義峪由藥王堂舊縣關南至興安北境約七百餘里應與舊縣關迤西地名孝義川添駐西安府分防同知山西自長安子午谷由江口西南至五郎關直抵漢中府北境約亦七百餘里應將西安府水利通判改為分防通判移駐五郎關臣荷

聖恩簡任巡撫先後十年於地方一切因革事宜隨時悉心體察凡此改設明知有費更張但今昔情形迥然

大異而山川阨要形勢阻深不得不為未雨綢繆之計斷不敢因循拘泥惜有限之費致異日貽誤地方也部議允行又奏修西安城垣及城外灞橋遵

旨勘估於明春開工秋八月盤查延榆綏鄜各府州屬監糧其月長女智珠贅婿陳暉光祿寺卿孝泳子冬十一月

上諭大學士九卿科道及各直省督撫凡士習民風官方吏治尚有未經整飭者直抒所見據實陳奏公覆奏大旨以為國家大計不過民生吏治二端而建官之本在勤民勤民之要惟足食竊謂衣食之源農田為上畜牧次之因土宜而盡民力收自然之利施於西

北等省尤當而易行關右大川如涇渭灞滻豐瀆潦
潏河洛漆沮汧汭等水流長源遠若能就近疏引築
堰開渠到處可興水利或勸民自爲疏濬或酌借公
項代爲辦理則以時蓄洩自無水旱之虞而瘠土皆
良田矣又古來雲中北地五原上郡諸處畜牧爲天
下饒至以谷量牛馬若飭令各屬有司詢問鄉堡每
邑計其成數情願畜牧者約有若干人駝馬羊牛約
需若干匹由府彙報到司酌籌閒款購買分給民間
令其試養俟次年孳生後除交還官項外餘卽賞給
本人以爲資本則邊氓生計可望漸臻饒裕終南太
白汧渭沙苑之間尤係歷代畜牧之場亦可徐徐籌

辦果有成效則新疆各路屯兵民戶俱可做而行之
令其耕作與畜牧相兼此實邊土無窮之利也又近
日之吏病在貪酷者日事誅求而良善難安生業因
循者聽從胥隸而閭里鮮得甯居其中稍有才具者
又復以應酬爲能不以地方爲事當隨時釐剔而創
懲之並飭各州縣官於本境四鄉或一歲之內或一
季之內必輕車減從周遍巡行按查保甲稽察游惰
如有利病所關應行應革事宜具稟上官隨時查辦
奏入部議以格於成例不果行是年奉

賜

御製言志詩墨刻一卷知過論墨刻一卷補刻明代端石

蘭亭圖帖一卷公著樂遊聯唱集時在幕府者長洲

吳舍人泰來江甯嚴侍讀長明陽湖洪孝廉今翰林

院編修亮吉孫文學今山東兗沂曹道星衍嘉定錢

明經今乾州州判培皆吳會知名士門人伏羌令楊

芳燦序之

四十八年癸卯五十四歲

春正月奉

旨復還原品頂帶仍准支給廉俸二月續奉

諭旨畢沅現已服闋准實授陝西巡撫公以去冬關中年

豐人樂因與吳舍人泰來及幕中文士為消寒之會

自壬寅十一月十七日始每九日一集至癸卯二月

二日止分題拈韻成官閣圍爐詩二卷三月署理陝

甘總督印務抵蘭州任次女還珠生夏四月回巡撫

任京察屆期吏部開列在外督撫名單進

呈奉

旨畢沅宣力封疆克稱厥職著交部議敘六月省城開工

秋八月奉

命監臨文闈冬十月典試武闈十一月至榆綏二屬勘災

並奏明輕重戶口分撥銀米撫卹及蠲緩加賑各有

差是年奉

賜勦捕臨清逆匪紀略一函平定兩金川戰圖十六幀

四十九年甲辰五十五歲

春二月奉

賜

御筆玉屏詩畫墨刻二幅夏四月甘肅鹽茶廳逆回聚眾
 攻奪城堡由靖遠渡河焚掠靜甯隆德莊浪逼近平
 涼勢甚警急公間即調西安滿漢兵三千五百名星
 速策應而鳳翔隴州汧陽山險徑雜有通甘小路一
 十七處恐賊乘虛闖入則搜捕轉難復選本標及滿
 營兵前後得二千屬副都統敷公倫泰帶往鳳翔又
 調山西太原鎮兵一千協力防禦是時賊屯通渭之
 石峰堡分走伏羌秦安並靜甯州之底店雷打灣驛
 道梗塞公先有請發京營勁旅之奏至是

命大學士公阿公

桂

尙書男福公

康安

領侍衛內大臣侯

海公

蘭察

等統領火器健銳兩營兵二千名赴甘進

勦於六月中過西安公議以底店雷打灣大路賊匪
 爲肘腋之患必先廓清而後以全力蹙之則石峰堡
 勢孤無援立可摧破又檄興漢鎮總兵三德帶兵二
 千由秦州直趨秦安繞截其後賊不能竄用能於浹
 旬之間面縛凶渠殲絕餘醜至於糧饟軍火驟馬鍋
 帳凡京營暨各省兵往來供支萬緒叢萃咄嗟立辦
 秋七月大兵凱旋八月兼署西安將軍印九月卸事
 冬十二月奏請

陸見按東坡生日設祀詩一帙是年公序而刊之有云覽

乎遺文嗟不並世求其宦蹟近在於茲蓋公尙友蘇公見於篇什者非一其東湖坐月云論我平生太徽幸宦遊多得近前賢又重過東湖云焚香莫怪低頭拜熟讀公詩已卅年抑何神往於峩眉也

五十年乙巳五十六歲

春正月赴京

陛見奏進華嶽圖志有云十三門部居州次期鉅細之無遺卅二卷類聚區分庶始終之可貫二月

上御乾清宮考試翰詹諸臣

召公至南書房和詩既出京途次保定奉

命調補河南巡撫時以豫省河工連年漫溢衛輝一帶屢

被旱災公具摺謝

上硃批云論恆情則陝要於豫論目前則豫要於陝汝自知之無俟多諭一切勉之可也在途屢接

諭旨籌畫災賑事宜公由彰德至衛懷一路詢問僚屬農民冬春所得雨雪是否即可耕種狀及抵任奏請截留漕糧二十萬石以平市價濟民食並運貯楚旺五陵濬汲等縣水次官倉以待撥用

上覽奏增給三十萬石

硃批云所思周到調汝實得人矣如此盡心民瘼或邀天佑朕爲彼一方民慰幸也是月次子嵩珠生公抵汴日遣官馳赴太白山靈湫取水三月十五日水到開封

金山縣志卷之四
設壇大相國寺率文武步禱越二日得雨二寸餘有
禱雨大相國寺爲充公和尚題朝清涼山圖及喜雨
詩旋奏請開封河南彰德歸德懷慶陳州六府許陝
二州等屬四十八州縣所有本年及上年未完錢糧
倉穀俱緩至秋後開徵又請蠲免衛輝府屬及附近
災區之武陟修武原武等本年應徵地丁錢糧又請
於前緩徵之祥符陳留蘭陽儀封滎澤內黃六縣積
歉旱重請

旨全行豁免其餘分別蠲緩各有差又請濬賈魯惠濟兩
河以資商運其略云日今雨澤缺少田功未赴小民
更多失業趁此青黃不接之時鳩工開挖將年力可

用者挑赴河干酌給口糧以資力作是此舉不但於
民食商販有益而以工代賑無業窮黎亦可藉資餬
口實爲一舉兩得先是有

旨被淹積歉之區加賑一月口糧無地極貧下戶加賑兩
月至是更請於汲淇新鄉獲嘉輝延津濬滑封邱考
城武陟修武陽武原武十四屬無論極次貧民再加
賑卹兩月柘城巨盜聚黨三百餘人劫奪村落抗拒
官兵公督同司道親往立擒之悉置於法民皆悅服
上嘗登澂霽閣念公勤勞

御製詩書扇以

賜並大小荷包三對仍交部議敘自五月至六月先後奏

金山學公年譜
報各屬得雨入土一二寸及六七寸不等秋七月覆
奏引河分溜分數及睢州大壩情形其略云睢州大
壩龍門淤成膠泥大灘雖得挑水壩之力亦由上淤
引河分溜并池下新河冲刷極深是以龍門淤厚溜
勢北趨誠如

聖諭實爲極好機會臣等自當隨時相度籌辦俾高家寨
一帶險工不致著重以期永慶安瀾八月奏報各屬
雨澤霑足秋禾豐稔並河水減落堤工穩固各情形
冬十月同大學士公阿公桂河道總督蘭公第錫會
勘高家寨挑水壩各工訖事十一月遵

旨親赴桐柏山尋淮水發源處具奏並估修東瀆大淮神

祠及禹廟工程奉

賜

御製淮原記云今歲豫旱於春夏荆歙旱於夏秋因循淮
水弱而清口淤旣而豫得雨於夏末則更黃水盛而
清口有倒灌之患其間晝夜卜度來往疇咨蓋不可
屈指數矣因思淮之弱必其原之微或有沙石壅塞
以致遏其流乎其時撫臣畢沅以辦理賑卹事宜不
能分身往則命布政使江蘭往致禱淮瀆祠且相其
原之形勢旣而江蘭奏淮瀆故有祠更有禹廟並得
三大井於禹廟東引歸正河遂成巨川因具圖貼說
呈覽朕觀其圖谿澗縈繆山林深秀所謂三泉者未

必卽眞原也其時賑卹章程已定迺命撫臣畢沅親至胎簪山頂遂得眞淮原具圖以來於是導淮自桐柏之言始信蓋胎簪卽桐柏之中峰桑欽水經非誤也酈道元注以爲注澧同原西流爲澧東流爲淮則今之分水嶺實在胎簪峰下按圖可求淮澧分流此又一證也夫天下之理豈易窮哉若據江蘭之奏定三井爲淮原則胎簪之眞原湮矣然弗湮也桑欽酈道元之語固在也今偶湮之而後世必有執水經注以笑我君臣之不讀書矣茲不惟喜瀆原之得眞更以嘉古人之用心勤而千載之下必有相知之人也江蘭向在部中爲能馳馬耐辛苦之能員是以屢陞

用至今職而於登峰造極跋涉以求得眞原乃讓身軀孱弱佔畢之儒臣斯則在立心之堅定與不堅定及讀書與不讀書之分耳旣記其巔末並以嘉畢沅也沅其勉之公奏謝有云原原本本闢方言三井之訛是是非非援酈注雙流之證十二月閱兵南陽時許州壽民張正朔年一百歲商城縣壽民董以文年一百一歲公奏

旌之

五十一年丙午五十七歲

春正月奉

賜經筵御論一卷二月奏請借項修築沁隄俾固河防兼

可以工代賑春雨霑足薯種足資民食分撥各屬乘時栽種三月趨赴正定

行在迎

鑾蒙

恩賞穿黃馬褂並

賜

御製詩一章公奏謝敬和恭進夏四月詣登封報謝嵩嶽見舊有配殿塑泰華衡恆四嶽帝像公以五嶽秩並尊崇今四嶽列其配享於典禮未協且建在二門外東西對向尤爲慢褻乃於三門外迤南半里得空屋一所移奉神像改爲五嶽靈祠其廟中舊配殿改塑

風雲雷雨四神按公嵩陽吟館集凡三卷中有嵩嶽紀游六十首皆爾時作豫省連歲洊饑凡有恆產之家急求鬻產餬口其價值不及平時十分之二三甚有以種麥將熟之地賤價准賣者山西豪強富戶聞風赴豫舉放利債藉此准折地畝公與藩司酌議通飭各屬出示曉諭凡民間自乾隆四十九年以後賣出田產如價值過賤者許其備價呈明地方官取贖以三年爲限至近日連麥准賣之地限半月內呈明聽令原主收割除歸原價仍照典鋪二分取息之例按月算給若買者先已收割卽核計所收麥價除去本利其贏餘同地退還儻有佔據不行放贖卽依重

身山畢五年譜
利盤剝例從重治罪使豪強無能兼并而貧民不致
終於失業奏入奉

硃批此奏實可嘉恐汝地方官力量不及卽明降旨照汝
所請行矣於是私邀中保贖回者亦有呈明官府
斷結者

上批公奏云好今陞汝爲湖廣總督俟此事辦完汝方可
赴任並有

旨交部議敘公奏謝有云維元氣有回期歲稔必資夫恆
產奈蚩氓無遠慮計窮早棄其先疇爰思調劑之宜
使豫省各還其素業並立勸懲之術俾晉民無缺於
朱提藉昭處事之均平實屬應爲之職分秋七月挑

濬賈魯河工竣開歸所屬濱河州縣蝗嚴飭搜捕有
捕蝗詩一首河工秋汎安瀾奉

旨交部議敘八月奉

命監臨文闈時湯文正公斌子姓氏微公訪得其嫡孫有
爲諸生而學臣遺未錄送者徑取其名註冊入試是
科果領薦冬十月典試武闈屬伊陽縣有拒捕戕官
之案奉

旨仍留河南巡撫任公來河南至是已二年日擊旱荒之
苦故舉政發令民無不感泣者新安方上舍正樹在
公幕中爲作河南新樂府六章一請漕糧二靖柘城
三開沙河四錫詩扇五種蕃芋六設粥廠紀公之事

頗詳

五十二年丁未五十八歲

春三月閱兵河北夏四月挑濬陶北河五月工竣六月河洛沁驟漲自三五尺至一丈二三尺不等睢州下汛十三堡堤工東西漫口各二十餘丈公督同司道分赴上游險工往來搶護而下游水深湍猛亟應圈堤築壩創槽下埽並於大河分溜處斜築雞觜挑壩逼溜歸河以期迅速合龍又查明睢州甯陵商邱永城鹿邑柘城六屬被水村莊分別賑卹蠲緩上命大學士阿公桂臨工會同籌辦秋八月奏報豫省一百六廳州縣秋禾分數合計約收九分有餘九月弟

瀧在籍以公命蠲吉二十三日奉張太夫人觀合葬

贈榮祿公新阡冬十月奏報合龍日期奉

旨畢沅著交部議敘按公集有塞黃河決口新樂府六章十一月奏以下南河同知改駐黑岡俾便要工公以河務積勞邁疾幾殆至歲暮始稍瘳故明年有新正病起遣懷又病起耳聾諸詩是年奉

賜皇極殿燈聯詞墨刻又

賜緯絲蟒袍一件

御用大荷包一對小荷包二對自關中移節迄今三載公暇蒐羅金石文字考其同異聚而拓之編為中州金石記五卷

石記五卷

五十三年戊申五十九歲

春三月設壇大相國寺祈求雨澤並遣官分詣嵩嶽
太白山龍湫取水公率僚屬虔心步禱自三月至五
月大河以南陸續得雨深透麥收仍約十分至七分
不等惟河北各屬節次得雨不過二二三寸麥收歉薄
公親詣輝縣祭告衛原廟並遵

旨撥運麥穀十萬石減價平糶又飭將常漕各倉不拘常
例糶借兼行民食賴以充裕復於衛原之百泉懷慶
之丹河九道堰及附近太行山麓向有泉源者飭令
道府等集夫疏濬以收灌溉之利其後甘霖疊沛轉
歉爲豐有禱雨紀事及喜雨詩又請將臨河新灘有

地無收之糧銀改於通省攤徵及積年帶徵未完錢
糧分年攤完以紓民力旋奉

旨寬免會荊州江水異漲潰決堤塍荊州闔境被淹
上以湖廣諸事廢弛

特授公爲總督兼署湖北巡撫不必來行在請訓又發部
庫銀一百萬兩爲工賑之用秋八月馳抵荊州接印
視事卽會同

欽差大學士阿公桂戶部侍郎德公成相度情形詳悉籌
辦時荆郡城中積水雖就消涸而屋舍損壞十九一
切資糧器具漂失無存居民多於高阜搭蓋席篷風
棲露宿公至之日查明貧乏戶口按月散賑給資修

身山學公年譜
其其餘被水災區若荆屬之公安監利石首松滋枝
江宜都及武昌府屬之江夏武昌咸甯嘉魚蒲圻興
國大冶漢陽府屬之漢陽漢川黃陂沔陽黃州府屬
之黃梅廣濟黃岡羅田蘄水蘄州安陸府屬之潛江
天門荆門當陽德安府屬之雲夢應城並宜昌府屬
之長陽爲最飭委道府先行勘明輕重災分戶口細
數分別撫卹加賑或借給口糧籽種卽令於先後涸
出地畝補種穀蔬或布種冬麥此外窮民無業者現
在城隍各工並舉自可悉赴工次力作以工代賑不
致流離至荆州萬城隍漫決二十餘處公往來履勘
因見大江自松滋而下折向東北荆州府城一帶江

面比上下游較窄中有淤沙一處漸長漸大叢生蘆
葦土名窖金洲江水至此順洲分南北流至尾始合
蘆根四面盤結水過處淤積泥沙洲身日長日高障
蔽南面逼溜北趨水勢梗塞不得不直注隄根下游
愈壅則上游湍悍愈無處宣洩其冲潰實由於此公
飭官屬將洲上蘆葦悉數剷伐刨根犁土永無萌發
使江流不致頂冲然後乘勢酌挑引河引溜注入冲
刷洲沙自當日就平坦設遇江水盛漲亦可平漫洲
頂無壅遏之患而北岸迤東一帶水流漫緩漸次淤
出新灘則隄塍均足資保護矣奏入奉

硃批所奏頗合機宜又奏修荆州城工

關帝廟工萬城隄土石各工文武衙署滿漢各營兵房
又請以水利同知移駐萬城隄條縷章程纖悉周備
尤於撫賑一事恐不肖胥吏冒混剋減先飭各屬將
村莊堡壩名目災戶姓名口數輕重災分極次等第
詳立檔冊於查實後出示曉諭使小民咸知應領確
數仍與司道等分路按冊抽查毋令絲粟得飽慾壑
公謂稍一滋弊卽不足宣布

皇仁徧甦民因其經緯精密如此按公荊州述事詩十首
有云人鬼黃泉爭路出蛟龍白日上城遊涼月千家
嫠婦哭清霜萬杵役夫聲冤埋魚腹彈湘怨哀譜鴻
鳴寫楚吟昏墊之情蕩析之狀略可見矣九月卸巡

撫事冬十一月抵武昌省是年奉

賜

御製文二集兩函

御筆仿李迪雞雛待飼圖墨刻一卷

五十四年己酉六十歲

春二月至荊州三月萬城隄土石各工全竣遵

旨鑄造鐵牛九具安鎮隄壩添建江神祠並以水師營守
備兼管江防設卡巡護又以隄根坑潭之處甚多皆
由歷久民間歲修就近取土所致若水漲停注頗礙
隄身請卽於窖金洲翻犁洲地時挖取蘆根遍植隄
外一二年生長茂密根柢盤固卽可捍禦奔流似亦

化無用爲有用之一法奉

硃批甚是之舉一舉兩得也又請修

文廟考棚龍神祠府城隍廟 京察屆期吏部開列督

撫名單進

呈奉

旨交部議敘續奉

諭旨此次工程浩大畢沅能遵照指示機宜認真辦理妥
速竣工著交部議敘夏四月閱兵宜昌襄陽順勘老
龍隄工添築挑溜碎石壩四座按公自荊州往來宜
襄凡所經歷率以詩紀之如當陽長坂坡麥城仲宣
樓峴山亭習家池鹿門山夫人城三游洞至喜亭扇

子峰絳雪堂等數十首皆憑高望古感喟淋漓其蝦
蟄培黃牛峽二章山川奇險洞心駭目靡不抉摘呈
露視少陵入蜀諸作殆如驂之靳也秋八月公六十
初度賦自壽詩十首有句云爲戀

主恩非戀職只求民隱不求名私願康甯同物我最虞衾

影負

君親大臣心事真能以民物爲一體者長孫蘭慶娶婦曹

氏翰林院侍讀學士廣東學政 仁虎 女九月勘估常

德府石櫃工程並巡閱撫提二標及鎮筸永州鎮各
營官兵有涉沅十九首浮湘十首衡嶽紀游六十首
姪裕曾應江南鄉試中式舉人公弟澧子冬十一月

兼署湖南巡撫事十二月卸事旋武昌是年春

賜

御批通鑑全部

御製平定臺灣二十功臣像贊序墨刻一卷生擒林爽文

紀事語墨刻一卷生擒莊大田紀事語墨刻一卷編

訂詩經樂譜全書一部

御題太常仙蝶詩並韓幹明皇試馬圖墨刻各一分

五十五年庚戌六十一歲

春正月奏請修復潛江縣仙人隄其略云易家拐隄在澤口西北正當漢江之冲上年六八兩月江流異漲上游宣泄不及倒漾而西致江陵監利荆門均有

滯淹今隄已冲刷成潭不堪補築若不就舊人所築廢隄因勢修復一經汎水漲發四屬田廬同受浸灌之害則賑費更鉅且借帑興修數只三萬餘兩攤之四屬緩以三年尤屬眾擎易舉閭閻生計不致有竭蹶之虞而保衛田廬實多裨益是時公莅楚已二載勤於庶事凡所興作皆隨時制宜因利乘便羅全局於胸中然後口講指畫秩如就理其爲政不務察察之行而綜覈名實物無遁情吏治翕然丕變楚南北江湖絲互往往盜匪出沒侵掠商旅公飭有司暨營汎巡邏搜緝連獲巨盜二十餘悉置於法由是盜風漸戢北省民情健訟甚或借端誣陷冀以株連洩忿

一呈內牽至數十餘人追控准則原告隨亦竄匿多有累年不結者故諺有只圖准不圖審之語訟棍蠹役因以爲利州縣積案益多許告彌眾公接閱詞狀卽將具呈人押交藩臬審辦或督同親訊如虛坐誣並遴派道府分投各屬就近提訊若原告規避逾兩月卽將被告人證勘問明確照新例詳銷仍緝獲原告治罪棍蠹訪拏重懲二歲中審結大小一千五百餘案民遂無敢妄訟者滇銅運船必經由楚境公酌議章程條爲五事一銅船宜雇募堅固二銅斤宜過稱足數三險灘宜預爲趨避四水摸工價宜酌水勢加增五水摸偷竊宜嚴加防範又勘定各灘由險改

平者十二由平改險者六新增險灘五夏五月第三女懷珠生秋七月兼署湖北巡撫九月卸事冬十月復兼巡撫十二月卸事是年恭逢

聖主八旬萬壽

慶典覃敷曾祖以下三世

晉贈榮祿大夫妣皆贈一品太夫人公奏懇祝

嘏

上念地方緊要

諭止之至是一再籲祈赴

闕始得請奉

賜論語集解義疏一部

御製入巖口各詩墨刻一卷

萬壽衢歌樂章全部集石鼓文

御題張照墨刻王穀祥春籬待飼圖墨刻涇清渭濁圖墨

刻各一卷江夏萬廷模年八十四通城金逢貯妻張

氏年八十五並五世同堂公奏

旌之

五十六年辛亥六十二歲

春二月赴京

陛見恭進宋人布畫山水及李廷珪墨一方

御製詩二章並墨雲室記

命公與

內廷諸臣恭和進

呈

上久倚重公

獎勵甚至

恩免繳項銀三萬兩三月回武昌任夏四月奏改荆門州

為直隸州管轄當陽遠安二縣又請裁江陵縣郝穴

鎮監利縣朱家河巡檢二缺各改設主簿一員部議

准行楚省鹽務自公實心釐剔革陋規絕私販歲輒

溢銷十餘萬引時奉

諭旨以湖南之永順湖北之宜昌皆與川省相近何妨改

食川鹽以便民食著各督撫核議公議覆以為永順

宜昌爲鄰私入楚門戶其出沒處所水則山深峽險陸則鳥道羊腸實遏私之咽喉就兩府民食而論每年額銷不過三千餘引淮商似不必爭此綱地而有不能不爭者全恃此數處險隘以爲蔽私之地耳今若改食川鹽則如居室之毀其牆垣全無捍衛爲利不過兩府而爲害殊繫通綱實有捍格難行之勢應請仍循其舊奏入

上嘉納焉奉

賜

御製四得論四得續論墨刻二卷

御書墨雲室記古墨歌墨刻一分六月第三子鄂珠第四

女璇珠生秋七月奉

賜資盃一件冬十月廓爾喀滋擾後藏

王師西討公懇

恩酌派分理軍需奉

硃批可以不必十一月奉

賜

御刻唐顏真卿書朱巨川告身一卷

五十七年壬子六十三歲

春二月 京察屆期吏部開列在外各督撫名單進

呈奉

旨畢沅著交部議敘夏四月奉

命馳往湖南審辦巴陵縣鳳凰廳暨道州等案並巡閱撫
提二標永州鎮草鎮各營官兵有重登岳陽樓及紅
苗竹枝詞二十首六月旋駐荊州次女還珠許字陝
西巡撫秦公承恩子秋七月回武昌九月荊州城工
竣冬十月巡閱宜昌襄陽鎮各標營官兵時大軍克
復後藏廓爾喀畏懼乞降京兵凱旋過境公遵
旨轉飭所屬按例應付一無紛擾姪耀曾應順天鄉試中
式舉人公弟瀧子是年奉

賜

欽定舊五代史一部

御製正陽橋疏渠記墨刻一卷圭瑁說摺圭說墨刻兩軸

及蘇軾超然臺記墨刻一軸回疆三十韻墨刻一卷
五十八年癸丑六十四歲

春三月奏請添設安陸營把總一員分管陸路塘汛
並於竹山營裁汰一缺以均繁簡夏六月兼署湖北
巡撫事楚地西通秦蜀北接汴梁黃州路達江廣荆
州聯壤湘南爲滇黔之通衢漢口樊城沙市三大鎮
賈舶如雲向來市易錢文率多攙雜小錢屢禁不止
頗爲錢法之害公以三楚不產銅鉛並無奸民私鑄
則來源盡由私販奏請分飭上下游各關隘嚴密稽
查一面勒限設廠收買自五十五年以來先後收買
小錢三十萬九千餘斤發交寶武局鎔出銅鉛湊供

正鑄停買滇銅一年至是復請常用收買繳局改鑄以期日久淨盡並諭商船店舖有外來存積小錢匿不赴官繳首者一經截獲卽以私販治罪其應行應禁錢文設木版釘錢於上分別註明頒給市塵畫一遵守仍飭南北各道府於要隘關口實力督查以清其源秋八月卸巡撫事九月復兼巡撫事冬十月恩頒暎咭喇國所進嘑吱一端十二月卸巡撫事是年奉賜

御製十全記墨刻一卷臺灣戰圖十二幀

御製喇嘛說墨刻一卷修德修刑論及書隋文帝改元事墨刻二卷西藏善後事宜詩並凱旋兵丁各歸本營

紀事墨刻各一分通城縣民胡楚英年百歲興國州民劉之印年八十八廣濟縣民余錫臺年八十二並五世同堂公奏

旌之按公自訂集四十卷始於甲子迄於癸丑故自題集後云新編四十九年詩也其再題一首自序云予卯角就傅得唐六如畫譜一冊暇輒學爲山水師亦弗禁年十五先太夫人教之學詩謂其體接風騷義通經史非數十年冥心孤詣憔悴專壹不能工因遵慈訓舍畫專攻詩今忽忽花甲周矣頭白目眇老境漸逼搜篋中贖稟編靈巖山人集四十卷雖不能盡合風雅之旨而刻楮鏤冰此中亦頗費苦心略開面

目恨吾母不及見是集之成曷勝痛感過此以往精力日衰思致孱弱恐不能再有進境且仔肩艱鉅時懍鼎占覆餗之戒不敢復耽吟詠政閒公退末由消遣仍寫倪黃小幅聊以自娛此後或偶有小詩亦不過如香山入洛以後觸景抒情託之水流花放不再刻意求工矣續編一集爲繪聲漫藁系以詩云且拋風月雕鐫手聊作煙雲供養身未必名山容置我終思文苑列傳人雖執辭彌謙而得失寸心亦足徵其自信之篤也

五十九年甲寅六十五歲

春三月

駕幸天津公先於歲首專章請
觀既

報可二月由楚北上馳詣

紫泉行在蒙

召見

垂詢楚南北地方情形奏對稱

旨

賜詩一章

命卽和呈進時畿輔望雨綦切公和詩有

披衣五夜勤民意靈雨宵零理可推之句是夕果得雨
上大悅

賜福橘一盤公以年老多病乞補京秩

上諭云汝是好總督汝且去乃於趙北口送

駕夏四月回武昌任五月兼署湖北巡撫事秋八月奉

命監臨文闈旋卸巡撫事會陝西安康縣四川大甯縣邪

教案起皆稱傳教係湖北人展轉牽引至以百數公

馳赴襄鄖按獲訊辦九月奉

旨摘去花翎降補山東巡撫卽卸交總督印務仍馳往房

縣督緝遞上傳教要犯先後擒獲一百八十餘人歸

案定擬覆奏冬十月自襄陽啟行次孫芝祥娶婦汪

氏候選知府與孫女太學生瑚女十一月抵山東巡

撫任時河南衛沁二河秋汎泛溢淹及東省之臨清

德州館陶冠縣恩縣邱縣夏津武城暨臨德二衛蒙

恩加兩倍賞卹所有本年應納秋糧概行豁免公至之日

卽親歷災區查放展賑並請將本年漕米一體全蠲

猶慮加賑以後去麥秋尙遠民食旣急必致糧價日

增復籌款遴委幹員分赴沿河一帶豐收處所按照

市價糴買由水程運至附近災區等屬分晰存貯預

備明春平糴之用又由東昌而至臨清催趲漕運挑

濬開河靡不悉心籌畫依限戴功奉

硃批此番可謂用力矣有

旨交部議敘自十月至十二月濟南附近五十一州縣連

報得雪五六寸或有積至尺餘者民間交口稱誦以

爲非公敷宣

帝澤不足以感召休祥蓋一二十年僅見之事也第三女
懷珠許字

至聖七十三世孫襲封衍聖公孔慶鎔是年奉

賜

御筆四十二章經墨刻一卷行楷書墨刻二函

御製續纂祕殿珠林石渠寶笈序墨刻一分

欽頒慎戒思存墨刻有繪聲漫槩暨海岱驂鸞集共一卷

六十年乙卯六十六歲

春正月奉

上諭畢沅前因竹谿縣邪教奪犯毆差一案降補山東巡

撫咎在失察尙非不可原宥之過著加恩仍補授湖

廣總督公與學政阮公元商議修纂山左金石志搜

羅廣博攷證精核會有湖督之

命諄屬阮公繼成其事書成凡若干卷其義例皆公
定也先是奉

旨明年卽屆歸政所有各省民欠銀穀各督撫查明奏請

豁免公未去任前數日飭查山東通省節年正耗民

欠銀四百八十七萬四千二百一十一兩零又常社米

穀五十萬四千二百石悉奏除之旋卸巡撫事遵

旨卽赴新任二月行次襄城聞貴州銅仁苗民石柳鄧湖

南永綏苗民石三保聚眾滋事卽兼程由襄荆馳至

常德接奉

諭旨令駐荆常適中之地籌辦軍火糧饟妥速接濟且爲後路應援時調任總督福公甯提督劉公君輔帶兵在鎮筵進剿永綏乾州鳳凰等三廳其地並爲賊藪徵調益多轉饋彌亟公

奏於常德設局就附近辰州之長岳常澧及荊州等屬水次各州縣先儘常社存穀刻期碾運常郡寬爲儲備由辰州軍需總局陸續解赴軍營惟辰州以上向用苗夫背負此時自未便再行且運費浩繁若以船隻轉運朗江上游卽通五谿蠻地較用夫自爲省便已飭常德府縣多雇麻陽小船米到卽兌運至辰州

除酌留辰郡以備將來乾州打通接濟兵食外餘用原船徑運辰谿糧臺存貯辰谿爲鎮筵咽喉驛路運道俱由於此又自巖門砦以至鎮筵城四五十里巖重徑仄山後卽係苗寨出沒之處甚多必須派委文武大員專司輓運並於辰谿駐兵三百名用資防護而巖門砦以上層層設卡撥兵旣衛軍糧兼可周防後路再逆苗皆藏匿山谷非火攻不能得利已飭各該營縣將現存火藥先行解用並飭武昌漢陽二府督標中軍武昌同知等分頭製造並鉛彈火繩隨造隨解又札湖北藩司別在漢口多多預備硝磺運至常德交營配製一切軍行器械亦俱接續備辦隨時調

用又辰郡上游客商有因逆苗驚擾逃避來常者飭府縣酌給口糧妥爲安置其鄰近苗寨各州縣諭令鄉村鎮市團練壯健協力堵防並諭苗眾安分力耕毋爲逆黨煽誘自貽後悔如有奮勇急公擒獻首惡石三保及偵探虛實報聞者立予重賞至瀘谿係通乾州要隘且爲辰州門戶浦市尤沿江第一大市運道所必經前雖被賊焚掠尋亦奔竄近聞督臣福甯有三面進兵之議則東路必由瀘谿而入設有阻隔所關非細瀘城只有兵四百名蘇木谿三百名浦市二百名守禦尙單已札撫臣姜晟於前調北省兵過辰時卽截留一千名在瀘谿浦市防守且備進剿乾

州之用又北省宜昌之鶴峰州施南之來鳳縣均與永順接壤鎮臣張廷彥前將施南等處防兵帶往保靖該處地方緊要不便守備空虛已令於本鎮標兵內抽撥七百名前補施協額兵原數並添派兵八百名在於鶴峰來鳳宣恩等處各隘口設卡嚴防不特捍禦有資兼可爲保靖後路援應節奉

硃批曰所辦合宜曰諸凡用心可嘉曰此次布置有何說好閏二月抵辰州與湖南巡撫姜公晟會籌軍務復檄調武昌督撫二標兵一千名來辰飭鎮守鎮總兵袁敏統轄留駐瀘谿搜捕附近零星苗匪並檄宜昌鎮總兵張廷彥迅速進兵由保靖花園汛一路直向

永綏又於現在撫卹之三廳難民中遴選丁壯練集
義勇支給口糧器械派令防守城卡如果得力照臺
灣義民例獎賞各寨熟苗宣諭招徠被脅者准令自
首安分者加以撫綏其有爭先助順効命前驅卽分
別獎勵事平後將逆苗田產分給並酌給籽糧牛具
以廣

皇恩而收邊效奏入奉

上諭畢沅著交部議敘並賞給大荷包一對小荷包四個
賊寇瀘谿及歐谿洗谿公添派守城兵四百名令總
兵袁^敏擊退之又令副將豆^壽帶兵四百名出駐草
潭倚角歐洗兼為古丈坪一路聲援三月軌者寨百

戶石上進等帶同乾州西北六十二寨苗民詣辰投

誠是時大學士公福公^{康安}四川總督和公^琳已攻

破松桃嗅腦統安籠松潘二鎮兵直抵永綏提督劉

公^{君輔}兵亦來會賊解圍潰走公飭令於花園隆團

等處安設臺站一應糧饟軍火寬為儲備輓轡轉運

總兵張^{廷彥}遊擊馬^{天奇}駐兵接護其附近各寨落

降苗賞給銀布米糧或牛具籽種安心力作以散其

黨奉

上諭畢沅奏辦糧儲軍火等摺辦理妥協諸凡留心可嘉
著加恩賞戴花翎並賞大荷包一對小荷包二箇夏
五月新寨左近龍鼻背等三十二寨頭人石兆元詣

辰投誠又有辰州西界旦武營等二十五寨板犁坪
等四十三寨苗民咸來就撫六月保家樓苗寨頭人
石大貴帶同永順保靖及乾州西北八十八寨苗人
詣辰投誠秋七月大營進駐長營哨公馳至軍與兩
帥籌商善後之事並於鎮筸一路查催臺站復回辰
州八月乾州保靖永綏永順二百五十七寨苗民詣
辰投誠冬十月奉

上諭首逆吳半生業已俘獲畢沅於辦理糧餉軍火等件
均無貽誤著交部從優議敘十一月大營生擒賊渠
吳八月乾州陷賊良民及乾屬降苗前爲吳八月等
焚劫逃竄乘閒來歸者公飭令按名入冊散給衣糧

搭蓋篷廠並各路災民按月散賑卽委各員分路詳
查妥辦毋使失所十二月降苗縛獻賊渠石老四斬
之公綜理儲胥綢繆軍實自七月以後六省之師雲
集楚境供支日不下數萬而賊氛充斥動爲運道之
害旣設法疏通源源相繼咄嗟立應又安撫難黎招
納降苗心力煩紆鬚鬢爲之頓白每苗寨頭人入見
公輒便坐不設兵衛肫肫懇懇宣示

朝廷威德勉以自新羣苗咸叩頭涕泣而去相戒勿負公
恩故前後招安各苗五百有七寨迄無一反側者是
年奉

賜

御製上元燈詞冊識語墨刻一分平定安南戰圖墨刻一分

御製福康安奏報大勦逆苗詩和琳奏報勦捕秀山苗匪

詩墨刻各一分福康安和琳奏攻克黃瓜寨賊巢詩

墨刻一分姪憲會應順天鄉試中式舉人弟瀧子公

聞捷喜甚有得憲會姪北闈捷報喜而有作一首復

馳書貴州學政門人洪亮吉云是子詩文俱有根柢

今獲雋愜吾願矣是歲有五谿籌筆集一卷

嘉慶元年丙辰六十七歲

春正月恭逢

太上皇帝紀元周甲之期

御殿

授寶

皇帝登極

授受禮成謹撰典全一篇以獻奉

上諭此次畢沅所進詩冊措詞典雅尙爲得體著賞給蟒

袍料一件大荷包一對小荷包四箇以示獎勵續奉

恩詔文官在京四品以上在外三品以上各廕一子入監

讀書公長子念曾早亡以長孫蘭慶承廕湖北枝江

賊起宜都長陽長樂各有賊應之詭稱白蓮教聚黨

數千人四出焚掠公聞報飛章

奏卽兼程馳至枝江之望佛山與巡撫惠公齡調兵進

勦連克蕭家巖栗子山長嶺沖方家大山等寨擒斬
數百人復進克太和山山頂草棚布滿悉縱火焚之
斬二百餘人蒙

恩賞給玉扳指一箇黃絳珊瑚豆大荷包一對小荷包四
箇續

賞大荷包一對小荷包四箇公駐軍山梁餘匪竄入山北
之灌灣腦而宜昌府境宋家嘴對馬山又各有賊數
千人分擾遠安東湖當陽公遣兵分往協防復檄調
河南南陽鎮兵一千自荆門進發陝西興漢鎮兵一
千自鄖陽進發兩路合力以蹙之則賊勢不虞滋蔓
未至當陽陷公急馳抵荆州料簡現兵四百餘名圍

集鄉勇督同荆宜施道高杞署宜昌鎮總兵黃瑞等

由河溶徑趨蘇家河破卡殺賊二百餘人直薄城下

南陽鎮總兵阿克東阿率兵來會公令三面安營佯

留一面爲可竄之勢而陰於左近隘口部勒兵勇分
路設伏伺其出輒擊斬之凡有間諜無不立擒者是
時北省諸標營兵皆徵赴苗疆十不存二三賊偵知
守備空虛乘間竊發遠近勾結煽誘荆宜襄鄖施五
郡所在充斥多且數萬少者數千人破保康來鳳竹
山燒呂堰樊城圍襄陽三楚震動公先有請發京營
勁旅分駐襄鄖荆宜之奏至是

特命西安將軍恒公瑞烏魯木齊都統永公保統滿兵二

千來楚公札恆永二帥暨興漢鎮總兵文圖由興安

進勦鄖陽之賊又札大學士四川總督孫公士毅由

秀山一路兩江總督福公甯由龍山一路進勦施南

之賊原任四川總督鄂公輝進勦襄陽之賊公自與

前將軍舒公亮留屯當陽賊眾登陴抗禦甚力公令

於城外分築礮臺製造雲梯日夜環攻不息又募驍

健丁數千扼守要隘殲其外援二千餘人蒙

賞喜字玉扳指一箇大荷包一對小荷包四箇續

賞黃辮大荷包一對小荷包四箇襄樊告警恐賊擾及下

游預調江西兵二千駐守武昌甫入境孝感賊起公

奏令前將軍明公亮督兵破斬之鄖陽亦定

上以當陽日久不下盼捷綦殷夏六月公親臨前敵指揮

將士四面如牆而進以火箭火彈拋射城中風狂燄

發燒其礮臺並近城席棚房舍數百間復用計誘斬

偽大元帥楊啟元秋七月克東門賊退聚西北我兵

奮擊殺一千餘人擒偽帥陳德本餘黨悉平因籌當

陽善後六事一編審民戶二分撥營兵三裁撤鄉勇

四賑卹良民五旌獎忠節六修建城垣奏皆報可公

躬攬戎機兼籌全省軍火糧饟及徵發他省兵馬半

年以來遠則施南宜昌近則襄陽枝江諸大營援應

供饋靡弗仰給攝萬緒於寸心應百變於一瞬左宜

右有隨機合節又置身於桴鼓矢石之間從容擘畫

凝然秩然雖其才力絕人由是精神亦頗耗矣旋奉旨卸湖廣總督篆專查難民撫卹及賑贍荊州府屬之先為水淹者八月仍還總督任蒙

賞白玉喜字扳指一箇大荷包一對小荷包四箇仍總管撫賑之事親詣潛江天門沔陽漢川荊門鍾祥各州縣履勘災區疏銷積水查明戶口分別撫卹加賑並奏修沿江堤工賊竄鍾祥公飭守令嚴堵温峽口而自馳至觀山軍營與總統永公保廣州將軍明公亮定議擊破之賊走黃龍壩公馳抵襄陽分飭沿河各卡截獲逸匪三百餘人並督同巴里坤鎮總兵徐昭德襄德郎道胡齊率兵邀擊賊於青河口復殺二百

餘人生擒頭目夥黨一百五十餘人又刊發簡明告示如賊中有悔罪投出者許以更生量給口糧安置先後從賊中逃出乞降不下二千人皆免死給予口食安頓鐵佛寺令地方官密為稽查復委員攜帶銀米分赴各村莊安撫難民卽以解散餘黨奉

硃批此計是正宜如此蒙

賞白玉扳指一箇黃辦大荷包一對小荷包四箇秋九月

奉

上諭畢沅前此勦洗當陽賊匪擒渠俘逆肅清縣治著有勞績不可不加之懋賞著賞給輕車都尉世職用昭優獎時大兵征苗已二載大學士貝子福公康安四

川總督伯和公琳先後並薨於軍

上命廣州將軍明公亮湖廣提督鄂公輝馳往總統公以

苗疆略定

天討用申宜卽裁撤各苗寨官兵而於四面要隘之處酌
留防守因條縷其事密疏陳奏其略云今乾州已復
首逆吳半生石三保吳八月亦以次就擒僅止石柳
鄧未獲勢力窮竭無可逞其伎倆雖此外未剿撫者
尚多然俱零星寨落散處山谷其地不納賦稅其人
不供差徭而以十萬之兵駐守蠻荒山巒瘴霧毒氣
侵人師旅久勞未免疲頓又多疾病傳染且苗眾以
三廳為窟穴以耕種為生計今見駐有重兵廢時失

業口食無資自謂必無生理石逆等反得從中煽誘
以遂其糾結抗拒之計苗人甚眾誅不勝誅以臣愚
見轉不若乘其窮蹙予以自新卽如臣上年招降永
順保靖及永綏乾州東北境之五百餘寨至今並無
攜貳以此類推苗人亦非敢終於怙惡不過求延喘
偷生耳仰維

聖主胞與為懷凡負氣含生皆同赤子伏乞
赦其不共之罪

敕下明亮等宣示

恩慈先於四面各路將防兵安派停當扼其要隘固我藩
籬再將苗寨兵徐徐撤出各還各省營汛庶處處營

伍充實安堵無虞關係實爲至鉅所有苗疆地方楚省以鎮筸乾州永綏爲最要鎮筸後路之巖門高村沅州乾州後路之浦市瀘谿河谿永綏後路之花園隆團永順之古丈坪及黔省之銅仁正大營松桃嗅腦等處除本營額兵外酌量增添通盤籌算周圍扼要不過十二三處留兵二三萬分布控制卽有出外滋事者就附近各營用前人鷓鴣之法以懲儆之或共同類仇殺及尙有梗化之徒只須於各降苗內用以苗攻苗之計不值再加以兵力臣擬先將湖南貴州兵儘爲本處防守或不敷另議酌添俟募補新兵足數再令各歸本營仍飭鎮協內之驍勇幹練者酌

留一二員與本省鎮將合力防守又湖廣提督向駐常德距苗境幾四百里辰州爲三廳咽喉僅以副將在彼兵亦較少不足以壯聲威而資彈壓請將提督改駐辰州以便就近控制如此則兵不血刃民各相安而苗疆永慶敕甯矣奏入

上命下其章於軍中俾將軍等議之僉云平隴計日可破宜姑緩以待石柳鄧之就縛卽如所議施行而一時督撫諸公讀其疏者咸以公老成謀畫思深而慮遠雖趙充國之屯金城賈捐之之棄珠厓無以踰此也

冬十月

上以襄陽賊氛屢竄

特發京營健銳火器兵二千山東直隸兵各二千星馳合
勦公奏調直隸山東山西陝西馬各五百匹分遣幹
員親赴邊口挑買復得三千餘匹解送軍營爲衝陣
之用所需鑼鍋帳房趕造接解一切軍火糧饟安設
水陸臺站添雇夫騾船隻派員分投源源滾運親督
鎮道弁兵等於後路堵防施南旗鼓寨蕩平太子少
保福公甯率師回赴宜昌攻賊滋坵榔坪而太子少
保尙書惠公齡亦盡殲深沖涼山之賊奉

命來襄代永公保爲總統每向公諮訪開心見誠多所贊
益樊城經兵燹之後人煙凋弊井市寥闕公稽考史
乘茲地舊有城垣自晉以來廢興不一至前明傾圮

不再修實襄郡北江屏蔽奏請復築城垣以還其舊
十二月將軍明公亮旣破平隴追擊石柳鄧斬之生
擒其子石老喬旋吳廷義亦就俘

上念公前奏

命卽馳往湖南籌議安撫分撤各路官兵公覆奏云苗疆
久駐重兵地多荒廢苗民戶口繁多惟耕種自食其
力三廳歲止一收情形本甚拮据今蒙

浩蕩深仁撤兵俾安耕作首以清釐民苗地畝給還掌管
總不出來年二三月以內卽使一律播種不致有誤
春耕俟撫臣汪新抵襄接辦告知一切緊要事件卽
行起程是年奉

賜

御製宣諭建儲書事墨刻一卷

欽定石刻十三經一分四庫全書總目一分著有采芑集

一卷

二年丁巳六十八歲

春正月三日遵

旨自襄陽啟行馳往湖南會辦苗疆善後諸事其湖北軍

務交於巡撫汪公新接辦弟瀧向病噎公雖在軍旅

時時致珍藥冀克培養至是聞訃痛念手足為專人

經紀其喪二月抵乾州與將軍伯明公亮內大臣侯

額公勒登保內大臣子德公楞泰巡撫姜公晟提督

男鄂公輝詳悉籌議撤回湖北滿漢官兵七千二百

四十餘員名前赴襄陽宜昌協勦並四川雲貴官兵

亦一體陸續抽撤分赴達州南籠各軍營聽候調遣

三廳甫定公暨姜鄂二公奏請加賑及附近之麻陽

瀘谿永順保靖四縣難民各展至五月底停止又

會奏苗疆添設營汛官兵新設土弁修築城堡各事

宜其略云苗境地廣山深將來留兵全撤兵額較少

不足以資控制是築堡添兵實為目前急務今於花

園汛設立一鎮以附近之永綏協保靖營隸之改乾

州營為協以辰州副將移駐隸提督統轄其湖廣提

督兼駐辰州應將洞庭協移駐常德而以常德城守

營移駐洞庭此外如鎮筵屬之巖門汛廖家橋得勝
營小鳳凰營樂豪乾州屬之鎮谿所喜鵲營強虎哨
灣谿河谿花園屬之隆團涼水井沙子坳永綏屬之
滾牛坡鴨保寨辰州屬之瀘谿烏宿洗谿浦市永順
屬之古丈坪均擬設營駐兵互相犄角其中有因原
設額兵不敷防禦擬請增添者有向無營分今請添
設者有將原設營分酌量移駐者皆察看地勢緊要
節節布置期於控馭得宜統計苗疆兩鎮兩協各營
汛共添兵四千八百七十五名大小員弁擬添總兵
一員參將一員遊擊一員都司五員守備七員千總
十一員把總二十二員外委三十四員額外四十四

名酌量分駐彼此互相稽察苗寨悉在範圍庶邊防
呼應既靈而藩衛益昭嚴密又鎮筵所屬之四營永
綏所屬之六里地方遼濶羣苗錯處前經和琳奏定
章程擇各路降苗之明白曉事者酌放土守備千把
外委等缺管理苗民除前此明亮額勒登保德楞泰
驗充拔補外臣等隨時驗放前後約四百餘人凡苗
眾爭鬪竊盜等事責成查辦並照四川屯練降番量
給饟銀之例依次遞減仍察看苗人是否始終悅服
分別陞降賞革以示勸懲其保靖所屬六七八三都
亦一體設弁給銀用資約束至乾州鎮筵永綏保靖
各處城垣業經勘估興修其餘官兵安營之處濠溝

壁壘粗有規模只須補葺加高毋庸另建此外零星營卡卽令該弁兵自行砌築惟兵房一項應請一律蓋造每名給房一間各就本營汎地鱗次搭蓋安置兵眷而辰郡撥駐提標兵一千三百餘名帶眷遷徙亦應按照人數添蓋兵房俾供棲止奏入並勅部如所議行奉

賜

聖製詩五集一分三月教匪回竄應山武漢戒嚴公撤出北省標兵九百餘名交前任提督劉公君輔帶領馳駐漢口鎮復親歷鎮筵永綏一帶苗寨周加賞資撫諭倍至苗眾擁道歡迎伏地感泣並勘視三廳城堡

各工及衙署兵房事訖仍回辰州四月撤廣東西兵四千名飭交高州鎮總兵木騰額新太協副將官保

等帶往達州協勦又撤廣東兵一千七百餘名飭交

潮州鎮總兵托爾歡等分領回粵五月撤回雲南兵

一千八百九十七名廣西兵三千名分赴南籠西隴調遣續撤廣東兵三千名回粵各處城堡營汎兵房次第修造添募新兵足額留營差操苗疆外省防兵數萬至是全撤方公甫至之初遠近諸苗向嘗爲逆者猶芽孽其間反覆靡定當事深憂之公怵以嚴威結以恩信身率數騎出入蠻寨之中推心置腹如我赤子見者爭稽顙悅服奔走偕來遂乃洗甲韜弓還

師振旅境外有長城之固軍中無刁斗之驚戎政具
修邊患永弭跡其從容鎮靜若無所難而五月未周
萬里咸輯南人服諸葛吐蕃拜令公方諸古人何慚
鼎美矣苗疆向有神祠土人稱為白帝天王苗民畏
服屢著靈異奏請

勅封神號又從前三廳殉難文臣彭鳳堯武臣明安圖等
四十四員紳士王乙魁等四十餘人並盡節婦女查
明請

旨議卹公自為諸生時讀涑水資治通鑑輒有志續成之
凡宋元以來事蹟之散逸者網羅搜紹貫串叢殘雖
久典封圻而簿領餘閒編摩弗輟為續通鑑二百二

十卷始自建隆訖於至正閱四十餘年而後卒業復
為凡例二卷序文一首畢生精力盡於此書至是乃
付剞劂藝林鴻寶海內爭欲先觀為快公體素豐碩
頻歲久勞勩時時致疾猶盡心

國事宵旦不敢自安是月二十三日偶失足仆地侍者
掖起之左手足微不仁遂病

上聞

特賜

御藥房修活絡丹二十九丸屢

降旨詢問

諭令安心靜攝公感激

主恩雖在牀蓐仍力疾視事辰州本邊徼無良醫藥品尤劣服餌久不效至閏六月後病日亟次子嵩珠長孫蘭慶來侍疾惟屬以讀書上進勉報

鴻慈無一語及私秋七月三日丑刻卒於辰州行館臨終手草遺疏流涕望

闕作叩謝狀情詞悽愴並請以長孫蘭慶改襲輕車都尉世職而以次子嵩珠承蔭疏入奉

上諭湖廣總督畢沅老成練達勤幹有為宣力封圻二十餘載前歲勦辦苗匪經理軍儲並無貽誤上年教匪滋事該督帶兵收復當陽曾賞給輕車都尉世職嗣駐劄辰州辦理湖南苗疆善後及撤兵各事宜積勞

嬰疾特由驛馳賜丹丸俾資調理旋據該督奏稱數日以來尚能力疾視事節次諭令安心靜攝以冀速痊茲聞溘逝殊深軫惜著加恩晉贈太子太保所有應得卹典該部察例具奏至前賞該督輕車都尉世職著照所請令伊嫡長孫畢蘭慶承襲其應得蔭生移給次子畢嵩珠以示眷念施恩至意有五谿籌筆續集一卷八月靈輻旋武昌冬十月抵里禮部專疏請

卹奉

旨依議蘇州府知府任公 光炯 親詣讀文致祭其文曰

皇帝諭祭病故原任湖廣總督畢沅之靈曰鞠躬盡瘁臣

子之芳蹤卹死報勤國家之盛典爾畢沅性行純良
 才能稱職方冀遐齡忽聞長逝朕用悼焉特頒祭典
 以慰幽魂嗚呼寵錫重墟庶慰匪躬之報名垂信史
 聿昭不朽之榮爾如有知尙克歆享嘉慶三年春三
 月十八日其孤嵩珠鄂珠及孫蘭慶等奉櫬卜葬吳
 縣上沙舊有陸氏水木明瑟園公愛其幽曠購爲別
 業至是遂營吉壤少司寇青浦王公相表阡少詹事
 嘉定錢公大昕誌其墓信今傳後百世下庶有徵焉
 右年譜一卷善長於丁巳夏初從事辰州行館承公
 命掇拾編次甫及半而公已病矣將病前數日公笑
 語善長曰吾屢以此事屬君君牽於眾務卒未就平

生本末咸在聞知比十年尤所親見心勞力瘁具有
 萬端庶君能條縷而宣達之惟冀速成幸毋嫌能事
 促迫也嗚呼孰意其將歸道山若有先見耶公長身
 偉幹豐頤而廣額疏眉目容止威重望若天人其政
 務崇

國體卹民艱僚屬推誠不爲苛察人亦無敢售以欺詐
 所交皆當代鉅卿初在

樞庭史文靖公居政府每見必稱大才機鑒精明引薦
 多成偉器今大學士諸城劉公四川總督宜公前兩
 江總督福公雲貴總督富公陝撫秦公雲撫江公貴
 撫馮公楚撫汪公並其向時屬吏也尤好延攬英畷

振拔孤寒士之負笈 指登走其門者如鷺片長薄技
罔弗甄錄海內慕爲登龍餘姚邵學士二雲經術湛
深陽湖洪編修稚存孫觀察淵如文章博瞻咸得公
講授汲引之力逮沒士林痛傷之性恬淡無他嗜好
獨愛鑒別名人手跡凡晉魏以來法書名畫秘文祕
簡暨金石之文抉剔蒐羅吳下儲藏家羣推第一勤
學富著述從少至老無一日廢書每鏤布一種遠近
爭求至爲紙貴今未刊者尙有靈巖山人文集八卷
史籍攷一百卷河間書畫錄四卷三楚金石記三卷
湖廣通志一百卷嗚呼盛矣善長向客西徼早識公
越十年迺就幕府又六年而公卒從其喪由辰州歸

及茲始克送葬然知己之感未嘗一日去諸懷也公
嘗夢其前生爲終南山道士故寫終南招鶴圖以寄
意其沒也辰郡首邑沅陵喪歸以八九月與公姓名
字並符合益歎降嶽列星非偶然者因併記於末時
嘉慶戊午夏四月善長謹識

先祖 宮保公遺有經訓堂叢書關中勝蹟圖靈
巖山人詩集年譜各版片向藏家園庚申燬於兵
燹 長慶 大懼 宮保公一生著作泯沒不傳先將
年譜一卷付梓餘俟陸續重錄

同治十一年仲夏上澣孫長慶謹識

曾孫 庭森 謹校



金山學公館誌

卷一

